

Wie er die rechte kunst erler
Mit der er zu dem hymel ker
Vnd das all wißheyt diser welt
Ist gegen got eyn dorheyt gzelt
Vil meynen syn vff rechtem weg
Sie doch verirren an dem stäg
Der zu dem woren leben furt
Wol dem / der vff dem weg nit irrt
Wann er in schon ergriffen hat
Sann oft der neben weg ab gat
Das eyner bald kumbt ab der stroß
Es sy dann / das inn got nit loß
Hercles in syner jugent gdacht
Wes wegs er doch woltt haben acht
Ob er der wollust noch wolt gan
Oder alleyn noch tugend stan /
In dem gedänck / komen zu im
Zwo frowen / die er bald on stym
Erkant / an jrem wesen wol /
Sie eyn / was aller wollust vol
Vnd hübsch geziert / mit reden süß
Groß lust vnd freüd sie im verhieß
Der end doch wer der dot mit we
Dar noch keyn freüd / noch wollust me
Sie ander sach bleich / sur / vnd hert
Vnd hatt on freüd eyn ernstlich gfert
Sie sprach / keyn wollust ich verheiß
Keyn rüw / dann arbeit in dim schweiß
Von tugent zu der tugent gon
Dar umb würt dir dann ewig lon

mit
man
salen

